



ILITSEERSUUT

Akiliunneqarluni angalanerit

ilaannakortumik akiliunneqarluni angalanerit aamma sumiiffiup suliffiugallartup il.il.
nalinginnaasumillu najukkap akornanni angalanerup akileraaruserneqartarnerat



AALLAQQAASIUT

Akiliunneqarluni angalanerit akileraaruserneqartarnerat pillugu maleruagassat nutaat Inatsisartut, Aningaasarsianit akileraarutit pillugit Inatsisartut inatsisaata nr. 12, 2006-imeersup¹ allanngortinneqarneranik Inatsisartut inatsisaanni nr. 11, 1. december 2021-meersumi § 19 b-kkut aalajangiuppaat. Maleruagassat ukioq aningaasarsiorfiusoq 2022 aallarnerfigalugu atuutilerput.

Ilitsersuummi uani pineqarput:

- Akiliunneqarluni angalanerit
- Sumiiffinnit suliffiugallartuniit il.il. nalinginnaasumik najukkamut angalanerit

Ilitsersuummi pineqarput sulisup sulisitsisuminit akiliunneqarluni angalaneri, tassa angalaneq sulisumut namminermt tunngagaangat. Ilitsersuut aamma atuuppoq inunnut siulersuisuni, ataatsimiisitaliani, isumalioqatigiissitani, siunnersuisoqatigiinni, maalaartarfinni oqartussatulluunniit suleqatigiiffiusuni allani, matumani ilanngullugit Naalackersuisuni, Inatsisartuni kommunalbestyrelsenilu ilaasortatut qinigaasimasunut taakkunungaluunniit ikiortaasunut.

Ilitsersuummi uani taaguut "sulisitsisoq" tassaavoq sulisitsisut, suliaqartitsisut, peqatigiiffiit, aktieselskabit, aningaasaateqarfiit, kommunit, sullissiviit, siunnersuisoqatigiit, maalaartarfiit il.il., aningaasarsianik A-nik § 75, imm. 1-imi 2-milu taaneqartunik tunniussaqaartat unerartitsisussaataasullu tamarmik.

¹ Allamik allaqqasoqanngippat inatsisinut innersuussinerni tamani pineqarpoq aningaasarsianit akileraarutit pillugit Inatsisartut inatsisaat (kingusinnerusukkut allannguutai ilanngullugit).

IMARISAI

Aallaqqaasiut	2
Maleruagassaq pingaarneq	4
Akilerarusigassaanngitsut	5
Akiliunneqarluni sulinngiffimmi angalaneq akilerarusigassaanngitsaq	5
Atorfinikkiartorluni atorfirmillu soraarluni angalanerit	5
Suliffimmut allamut nuutsitaalluni angalanerit	5
Qanigisaasup perululluni napparsimanerani toquneraniluunniit angalanerit	5
Akiliunneqarluni angalanerit	6
Akiliunneqarluni angalanerit – akileraarutitigut nalinga	6
Sumiiffimmit suliffiugallartumiit il.il. akiliunneqarluni angalanerit	8
Siunertaq	8
Angalanerit pineqartut	8
Akileraarutitigut nalinga	8
Sumiiffik suliffiugallartoq	8
Sumiiffik aalajangersimasumik suliffiusoq, sulisup piffissani sulinngiffimmini najorsinnaanngisaa	10
Piffissaq akilerarusiiffissaq	12
Ukioq aningaasarsiorfiusoq 2022	12
Ukioq aningaasarsiorfiusoq 2023 taassumalu kingorna	12
Sulisitsisup akiliunneqarluni angalanerit il.il. pillugit pisussaaffii	13
Ukioq aningaasarsiorfiusoq 2022	13
Ukioq aningaasarsiorfiusoq 2023 taassumalu kingorna	13
Innersuussinert	14

MALERUAGASSAQ PINGAARNEQ

Sulisut namminerminnut tunngatillugu angalanerannut aningaasartuutit akissarsiatuulli akileraaruteqaataasussaapput, tak. § 13.

Tamanna atuuppoq angalanernut inuup namminerminut tunngatinnerullugu angalanerani siunertaqartunut, soorlu sulisup sulinngiffeqarnerani, sulinngikkallarnissaani imaluunniit qaangiuttoornerminik sulinngiffeqaateqarnerani.

Inuussutissarsiornermi angalanerit tassaapput inuussutissarsiornermut tunngatinnerullugu angalanerit. Inuussutissarsiornermi angalanerit sulisitsisup soqutigisaanut, sulinerullu ingerlanneqarnissaanut atasumik angalaneruppata sulisunut akileraaruteqaataassanngillat.

Sulisup najukkami nalinginnaasumillu suliffimmi akornanni ingerlanneqartarnini nammineq isumagisassaraa. Sulisup ingerlanneqarneranut tassunga aningaasartuutit sulisitsisup akiligarippagit, taakku sulisumut akileraaruteqaataassapput.

Najukkap suliffiullu akornanni angallanneqarneq ima isorartutigippat, allaat angerlarluni unnuinissaq periarfissaqarani, taava tamanna akileraartarnerup tungaanit isigalugu tassaavoq angalaneq.

Akiliunneqarluni angalaneruneranik imaluunniit inuussutissarsiornermut tunngasumik angalaneruneranik naliliinissami, pisunik ataasiakkaanik ataatsimut naliliineq tunngavigineqartassaaq.

Sulisitsisup sulisorinngisami, soorlu sulisup aappaata qitornaasaluunniit angalanerannut aningaasartuutit akilerpagit, taava taakku sulisumut akileraaruteqaataasussaassapput. Angalanerli taanna § 34, nr. 15 naapertorlugu akileraaruteqaataasussaassanngilaq sulinngiffimmi akiliunneqarluni angalaneruppata, imaluunniit atorfinikkiartorluni atorfimmillu soraarluni angalaneruppata. Immikkoortoq 3, maleruagassami pingaarnermi pineqanngitsunut tunngasoq innersuussutigineqarpoq.

Angalanerit akileraaruteqaataasussat akileraarutitigut nalingi sulisitsisup angalanernut aningaasartuutaanut naapertuupput, tak. § 19 b, imm. 1, oqaaseqatigiit siulliit.

Akileraarusiisarneq ajornaannerutinniarlugu Kalaallit Nunaata iluani aammalu avataani ornigassanut, Kalaallit Nunaanniit toqqaannartumik tikinneqarsinnaasunut akiliunneqarluni angalanerit nalingisa qaffasinnerpaaffissaat aalajangersarneqarput, tak. § 19 b, imm. 2. Immikkoortoq 4, akiliunneqarluni angalanernut tunngasoq innersuussutigineqarpoq.

Taavalu sumiiffinnit suliffiugallartuniit il.il. sulisut najugaannut angalanerit ilaat appasinnerusumik akileraaruserneqartarput, tak. § 19 b, imm. 3. Immikkoortoq 5, sumiiffinnut suliffiugallartunut il.il. tunngasoq innersuussutigineqarpoq.

Ilaannakortumik akiliunneqarluni angalanerit

2023-mut aningaasanut inatsisip Inatsisartunit atorussanngortinneqarneranut atatillugu aalajangiiffigineqarpoq ilaannakortumik akiliunneqarluni angalanerit akileraaruserneqamerigaluat atorussaajunnaarsinneqartoq.

Angalanerit sulisup ilaannakortumik akileeqataaffigisai

Angalanerit akileeqataaffiusut tassaapput angalasup angalanerimut aningaasartuutit ilaannik akileeqataaffigisai. Tamannattaq ilaanneeriarluni tassaasarpog ilaannakortumik akiliunneqarluni angalaneq. Taamaattoqartillugu sulisup akiliutai akileraarusigassanit ilanngaatigineqartassapput.

AKILERAARUSIGASSAANNGITSUT

Akiliunneqarluni sulinngiffimmi angalaneq akileraarusigassaangitsoq

Ukiumut ataasiarluni akiliunneqarluni sulinngiffimmi angalaneq maleruagassat tjenestemandinut atuuttut malillugit pippat akileraaruserneqartussaangilaq, tak. § 34, imm. 1, nr. 15. Sulisoq arlaleriarluni akiliunneqarluni sulinngiffimmi angalappat, taava angalanerup ataatsip saniatigut angalaneq (angalanerit) akileraaruserneqassapput.

Akiliunneqarluni sulinngiffimmi angalanerit akileraaruteqaataasussaangitsut suunerinut tunngatillugu innersuussutigineqarpoq Akileraartarnermut Aqutsisoqarfiup akiliunneqarluni sulinngiffimmi angalasarnerit akileraarusersorneqartarnerinut ilitsersuutaa 25. april 2008-meersoq.

Atorfinikkiartorluni atorfimmillu soraarluni angalanerit

Atorfinikkiartorluni atorfimmillu soraarluni angalanerit tassaapput atorfinitsitaanermi atorfimmillu soraarnermi najukkap sumiiffiullu suliffigisap akornanni angalanerit.

Angalaneq tassaassaaq sulisup najugareqqaagaaniit sumiiffimmut suliffigisassaanut, sulisup najugariligassaanut angalaneq.

Atorfinitsinneqarnissaq siunertaralugu angalatinneqarnerit atorfinikkiartorluni atorfimmillu soraarluni angalanertut isigineqanngillat, tassaasinnaallutilli nuutsitaalluni angalaneq, tak. 3.3.

Atorfinikkiartorluni atorfimmillu soraarluni angalanerit aningaasartuutit sulisup angalaneranut aningaasartuutit isigineqarput, taamaammallu akileraaruteqaataasussaananik. Atorfinikkiartorluni atorfimmillu soraarluni angalanerit ilaapputaaq katissimallugu aapparisaq, inooqatigisap qitornallu 18-it inorlugit ukiullit, sulisup inoqutigisaasa angalanerit. Angalanerup atorfinikkiartorluni atorfimmilluunniit soraarluni angalanertut isigineqarnissaani sulisup inoqutaasalu ataatsikkut angalasimanissaat piumasaqaataangilaq.

Suliffimmut allamut nuutsitaalluni angalanerit

Nammineq qinnutigalugu peqquneqarluniluunniit nuunnermi angalanerit atorfinikkiartorluni atorfimmillu soraarluni angalanertut isigineqassapput. Angalanerit taakku sulisitsisup soqutigisai aal-laavigalugit pisutut isigineqassapput, taamaammallu angalaneq angalasumut akileraaruteqaataas-saangilaq.

Qanigisaasup perululluni napparsimanerani toquneraniluunniit angalanerit

Sulisup qanigisami perululluni napparsimanerani, qanigisap toqujartornerani imaluunniit toqunerani/ilisaanerani najuukkiartorluni angalaneranut aningaasartuutit sulisitsisumit akilerneqarsinnaapput.

Angalanerit taamaattut angalasumut akileraaruteqaataasussaanginnerat qangaaniilli periusiuvoq. Inatsisip 2021-mi allanngortinneqarnera periutsimik taassuminnga allannguinissamik siunertaqanngilaq.

AKILIUNNEQARLUNI ANGALANERIT

Akiliunneqarluni angalanerit nalingisa qaffasinnerpaaffissaat § 19 b, imm. 2-mi pineqarput.

Akilerarusiineq naliliussat aalajangersarneqartut malillugit pissaq, angalanermut aningaasartuutaasimasut naliliussanit qaffasinnerugaluarpataluunniit.

Angalanerup naliliussanit appasinnerusumik akeqarsimanera uppersarneqarpat aningaasartuutit sulisitsisumit akilerneqarsimasut kisiisa tunngavigalugit akilerarusiisoqassaaq.

Akiliunneqarluni angalanerit nalinginik, naliliussat § 19 b, imm. 2-mi taaneqartut malillugit akilerarusiinissami taamaallaat pineqarput sulisup sumiiffiup suliffigisami aamma najukkami, imaluunniit Københavnip akornanni akiliunneqarluni angalaneri. Københavnimut taarsiullugu ornigaq alla Kalaallit Nunaanniit timmisartorluni toqqaannartumik tikinneqarsinnaasoq toqarneqarsinnaavoq, tassunga angalanerup akia Københavnimut angalanerup akissaraluanit qaffasinnerusimangippat.

Angalaneq § 19 b, imm. 2-mi pineqartunut ilaangippat, taamaallilunilu akilerarusigassaappat akileraartartoq sulisitsisup angalanermut aningaasartuutai tunngavigalugit akilerarusiiffigineqassaaq.

Akiliunneqarluni angalanerit – akilerarutitigut nalinga

Akiliunneqarluni angalanerit akilerarutitigut nalingisa qaffasinnerpaaffissaat § 19 b, imm. 2, nr. 1-imiit 3-mut allasimapput.

Ukiumi aningaasarsiorfiusumi 2022-mi nalingisa qaffasinnerpaaffissaat tassaapput:

- inuup ataatsip akiliunneqarluni angalaneranut ataatsimut kr. 17.680.
- meeqqamut 2-niit 11-nut ukiulimmut ataatsimut kr. 8.840.
- meeqqamut suli marlunnik ukioqalersimangitsumut ataatsimut kr. 1.760.

Naliliussat procenti aaqqiissutissaq malillugu ukiumoortumik aalajangersarneqartarput, ukiorlu aningaasarsiorfiusoq naliliussat atuuffissaat sioqqullugu kingusinnerpaamik ulloq 10. oktober Akileraartarnermut Aqutsisoqarfimmit tamanut nalunaarutigineqartarlutik.

Kalaallit Nunaata avataanut kiisalu ornigassanut Kalaallit Nunaanniit toqqaannartumik tikinneqarsinnaangitsunut angalanernut akileraaruteqaataasussanut aningaasartuutit imatut angissusilerneqassapput:

Assersuut

Qaanaami sulisoq Australiamut akiliunneqarluni angalavoq. Angalaneq tamarmi 40.000 koruuninik naleqarpoq. Qaanaamiit Københavnimut uterlugulu angalaneq 20.000 koruuninik akeqarpoq. Københavnimiit Australiamut uterlugulu angalaneq 20.000 koruuninik akeqarpoq. Angalanerup akilerarutitigut nalinga ukiumi aningaasarsiorfiusumi 2022-mi (Qaanaamiit Københavnimut uterlugulu 17.680 kr. + 20.000 kr. =) 37.680 koruuniuvoq.

Naliliussanut taamaallaat ilaassapput billetsinut aningaasartuutit, angalanermut pilersaarut malillugu unnuisariaqarneq aamma mittarfinnut akitsuutit ilanngullugit.

Aningaasartuutit allat, soorlu biilnik attartorneq, neriniartarfimmi nerineq, aasarsioarfimmik attartorneq, charterferie il.il. ilanngunneqassanngillat, taakku aningaasartaasa qaffasinnerpaaffissatut killiliussaq inoraluarpassulluunniit. Aningaasartuutit taamaattut sulisitsisumit akilerneqarsimappata, sulisoq aningaasartuutininut sulisitsisup akiligaanut immikkut akilerarusiiffigineqassaaq.

Assersuut

Sulisoq, taassuma aappaa meerarlu 9-nik ukiulik Uummannamiit Københavnimut uterlugulu akiliunneqarlutik angalapput. Angalaneq katillugit 50.000 kr.-inik naleqarpoq, ilaqutariit siumut utimullu Ilulissani akunnittarfimmi unnuineri ilanngullugit.

Ukiumi aningaasarsiorfiusumi 2022-mi akileraarutitigut nalinga katillugu 44.200 kr.-iuvoq (17.680-it marluk taavalu 8.840)

Sulisitsisup angalanermit aningaasartuutaasa ilaat sulisup utertillugit akilerpagit, akileraaruserne–qartussaq tassaavoq angalanerup akiviata aningaasallu sulisup utertillugit akiligaasa nikingassutaat, taamaattorli naliliussat qaffasinnerpaaffissaat qaangernagu.

Assersuut

Sulisoq Tasiilamiit Upernavimmut uterlugulu 25.000 koruuninik nalilimmik akiliunneqarluni angalavoq.

Akiata affaa sulisup sulisitsisumut utertillugu akilerpaa (12.500 kr.).

Angalanerup akia (25.000 kr.) ukiumi aningaasarsiorfimmi pineqartumi naliliussap qaffasin–nerpaaffissaanit 17.680 kr.-iusumit qaffasinnerummat sulisoq naliliussap qaffasinnerpaaffis–saa tunngavigalugu akileraaruserneqassaaq. Sulisup akiliutaa ilanngaatigineqarsinnaammat angalanerup akileraarutitigut nalinga tassaalerpoq (17.680 kr.- 12.500 kr. =) 5.180 kr.-it.

Pissutsit immik ittut atuuppata, soorlu iluanaarniutiginninniartoqarpat, taava naliliussat qaffasin– nerpaaffissaat qulaani taaneqartut atuutsinngitsoorneqarsinnaapput. Taamaattoqartillugu aningaa–sartuutit sulisitsisumit akilernerqarsimasut tunngavigalugit akileraarusiisoqassaaq.

Siunertaq

§ 19 b, imm. 4-p imarai § 19 b, imm. 1-imi 2-milu pineqartunut ilaanngitsut. § 19 b, imm. 4-mi pineqartunut ilaapput inuit sumiiffinnut suliffiugallartunut imaluunniit suliffinnut immikkut ittunut aallartinneqarsimasut.

Aalajangersakkap siunertaraa angalanerit, "inuit kommunit aggornerisa avataanniittut il.il." pillugit malerugassani immikkut ittuni, Akileraartarnermut Aqutsisoqarfiup nalunaarutaaniittuni maannamut ilaatinneqartut akileraaruserneqartarnerannik aalajangersaanissaq.

Angalanerit pineqartut

Aalajangersakkami pineqarput sulinngiffeqarneq peqquutigalugu akiliunneqarluni angalanerit. Pineqarput sulisup sulinngiffeqarnermini qaangiuttoornerminillu sulinngiffeqaateqarnermini angalaneri.

Akiliunneqarluni angalaneq § 19 b-mi pineqartunut ilaanersoq pisuni ataasiakkaani ataatsimut naliliineq tunngavigalugu peqqaassaaq, kingornalu nalilerneqassalluni angalaneq § 19 b, imm. 4-mi pineqartunut ilaanersoq.

Aalajangersakkami taamaallaat pineqarput sulisut ukunani sulisuusut:

- Sumiiffit suliffiugallartut, imaluunniit
- Suliffit aalajangersimasut, sulisup piffissani sulinngiffiusuni najorsinnaanngisai.

Pisuni marluusuni tamaginni piumasaqaataavoq angalanerimi ornigassaq tassaassasoq sulisup nalinginnaasumik najugaa.

Ornigassanut allanut nalinginnaasumik najugarinngisanut angalanerit maleruagassami pineqartunut ilaanngillat, taamaamallu akiliunneqarluni angalanerit pillugit maleruagassat nalinginnaasut malillugit suliarineqassallutik.

Sulisoq nalinginnaasumik najugaqarfeqanngippat, taava angalaneq § 19 b, imm. 4-mi pineqartunut ilaassanngilaq. Taamaammat angalaneq akiliunneqarluni angalanerit pillugit maleruagassani nalinginnaasuni pineqartunut ilaatinneqassaaq, taamaattoqartilugumi sumiiffik suliffiusoq nalinginnaasumik najukkatut isigineqassammat.

Akileraarutitigut nalinga

Angalanerit maleruagassami pineqartut angalanerimut ataatsimut (siumut-uterlugulu) 2.000 koruunik nalilittut akileraaruserneqassapput.

Akiliunneqarluni sulinngiffimmi angalanerit akileraaruteqaataasussaannngitsut pillugit maleruagassat atuutiinnarmata aalajangersakkami pineqartut tassaapput, akiliunneqarluni ukiumut ataasiarluni sulinngiffimmi angalanerup saniatigut angalanerit.

Sumiiffik suliffiugallartoq

Sumiiffik suliffiugallartoq tassaasinnaavoq sanaartugassaq. Tassani aalajangiisuussaaq sanaartugassap piffissami siumut killiligaareersumi ingerlanneqarnissaa aammalu sanaartugassap annertussusiata nalunnginneqareernissaa.

Sumiiffik suliffiugallartoq pillugu aalajangersakkami pingaarnertut pineqarput sanaartugassat angi-suut, sulisut sumiiffimmi suliffiugallartumi sulisitsisoqarlutik suliffigisaat.

Sanaartugaq angisooq piffissami sivirusuimi suliaasinnaammat, sulisut sanaartukkap ingerlanneqarnerani nalinginnaasumik najukkaminnut akiliunneqarlutik angalasarput, angalanerullu siunertaa tassaasarluni sulinnigiffeqarneq. Sanaartugaq angisooq aalajangersakkami pineqartunut ilaanersoq pisuni ataasiakkaani naliliiffigineqartassaaq. Sanaartukkat ikinnerpaamik 500 mio. kr.-inik akillit sanaartukkatut angisuutut isigineqassapput. Imaangilarli sanaartukkat 500 mio. kr.-it inorlugit akillit aalajangersakkami pineqartunut ilaasinnaassanngitsut. Tamatumani aalajangiisuussaaq piffissaq sanaartorfiusoq qanoq sivirusitiginersoq, matumani aamma apeqqutaalluni sanaartugaq sulisunik nikittaallutik sulisunik sulisoqarnikkut ingerlanneqarnerasoq, tassa imaappoq sulisut ataasiakkaat sulieriarlutik sulinnigiffeqartarnerisut/qaangiuttoornerminnik sulinnigiffeqaateqartarnerisut, taamaalioreeraangamillu sanaartukkami tassani sulinertik nangittarneraat, kiisalu angalanerit sulisitsisumit akilerneqartarnerisut.

Tassani aalajangiisuussaaq sanaartugassap piffissami siumut killiligaareersumi ingerlanneqarnissaa aammalu sanaartugassap annertussusiaata nalunnginneqareernissaa. Sanaartugaq naammassippat sulisoq illoqarfimmi nunaqarfimmiluunniit allami suliffimmut tassaniittumut allamut nuussaaq. Sulisup illoqarfik nunaqarfillunniit (sumiiffigisami) qimannagu sanaartukkani allani sulilerpat, tamanna aalajangersimasumik suliffittut isigineqassaaq. Taava angalanerit sulisitsisumit akilerneqartut maleruagassat nalinginnaasut malillugit akileraaruserneqartassapput. Aalajangersakkami pineqanngillat sanaartugassat mikisut piffissamilu sivikitsumi suliassat.

Aalajangersakkamissaaq pineqartunut ilaangilaq sulisup, sanaartukkap angisuup naammassineqarnerata kingorna sumiiffimmiiginnarluni sanaartugassanik allanik suliaqalernera. Taamaattoqartillugu sumiiffik suliffiusoq tassaajunnaassaaq sulisup *sumiiffik suliffigigallagaa*.

Assersuut 1: sumiiffik suliffiugallartooq – sanaartugaq angisooq

A Islandimi najugaqarpoq, entreprenørimumilu E A/S-imi sulisuulluni. A sanaartugassami angisuumi Nuummi sananeqartussami sulisussatut aallartinneqassaaq. A sanaartugassap betonngitassaanik qaammatini 8-ni suliaqassaaq. Sulineq nikittaalluni ingerlanneqassaaq, sapaatit akunnerini 6-ni sulieriarluni sapaatit akunnerini 3-ni sulinnigiffeqartoqarluni, sanaartugassap ilaata A-p suliassaata naammassinissaata tungaanut. A-p najukkaminut siumututimullu februaarimi, apriliimi aamma juunimi angalanissai akilerneqassappoq. Angalanissat siunertaraat sulisup sulinnigiffeqarnissaa. Tamatuma kingorna suliassaaq naammassissaaq, A-lu juulimi Islandimut utissalluni.

A-p sumiiffik suliffigigallagassaa matumani pineqarpoq, sanaartugassarlu angisuujulluni. Taamaammat angalanissat § 19 b, imm. 4-mi, sumiiffinnut suliffiugallartunut tunngasumi pineqartunut ilaapput.

Februaarip qaammatani angalanissaaq, akiliunneqarluni sulinnigiffimmi angalanerit akileraaruteqaataasussanngitsut pillugit aalajangersakkami pineqartunut ilaassaaq, tak. § 34, imm. 1, nr. 15, taamaattumik angalaneeq taanna akileraaruteqaataassanngilaq.

Sanaartugassap aallartinnerani sumiiffimmut suliffissamut angalanissaaq, A-llu suliassaata naammassinerani angerlamut angalanissaaq inuussutissarsiornermi angalanertut isigineqassapput.

Taamaammat A-p 2022-mi apriliimi juunimilu akiliunneqarluni angalaneri (2 x 2.000 kr.=) 4.000 koruuninik nalilittut akileraaruserneqassapput.

Assersuut 1-imut nassuiaatit:

A suliassap naammassereernerata kingorna Nuummi sanaartugassami allami sulisussanngorlugu nuusinneqarpat, A § 19 b, imm. 4-mi maleruagassani immikkut ittuni pineqartunut ilaatinneqarunnaassaaq, tassami suliassap annertussusia nalunnginneqareersussaaq. Taava A kingusinnerusukkat akiliunneqarluni angalassaguni § 19 b, imm. 1-imi 2-milum aleruagassat nalinginnaasut malillugit akileraaruserneqartussaassaaq. Akerlianik A sumiiffimmi allami sanaartugassamik nutaamik suliaqartussaannngorlugu aallartinneqarpat, suliffiusussaaq nutaaq taanna § 19 b, imm. 4-mi pineqartunut ilaatinneqarsinnaassaaq.

Assersuut 2: inuussutissarsiormi angalanerit

B Nuummi najugaqarpoq, entreprenørimilu E1 A/S-imi Nuummittumi sulisuulluni. B 2022-mi martsimi Ilulissanukarpoq silaannarissarfinnik ikkussuiartorluni. B sapaatit akunnerini 5-ini Ilulissaniippoq, kingornalu Nuummut uterluni. B 2022-mi majimi sapaatip akunnerani ataatsimi Ilulissaniippoq kukkunernik iluarsiiartorluni silaannarissarfilla eqqortumik ingerlanerini uuttortaajartorluni, kingornalu Nuummut uterluni.

B 2022-mi junimi sapaatit akunnerini 5-ini Ilulissani suliassanik allanik suliaqariartorluni Ilulissanukaqqippoq. B piffissani Nuummiiffimmini E1 A/S-imi nalinginnaasumik sulivoq.

Angalanerit suliassat isumagineqarnissaannik siunertaqarmata, angalanerit inuussutissarsiormi angalanertut isigineqarput, taamaattumillu B-mut akileraaruteqaataasussaanatik.

Sumiiffik aalajangersimasumik suliffiusoq, sulisup piffissani sulinngiffimmini najorsinnaangisaa

Sumiiffiit aalajangersimasumik suliffiusut, sulisut piffissani sulinngiffimmini najorsinnaangisaat tassaatinneqarput sumiiffiit sulisut piffissani sulinngiffimmini najorsinnaangisaat, tassa isumannaallisaaneq taamatullu aamma sumiiffimmi init atugassiissutaasut pissutigalugit.

Pineqartunut ilaasut assersuutigalugu makkunani sulisuupput:

- Aatsitassarsiormik suliit sumiiffiit inoqarfiusut ungasissuiniittut
- Pituffimmi (Thule Air Base) sulisut

Sumiiffimmi suliffiusumi isumannaallisaanerup, tasanilu init atugassiissutaasut pissutigalugit sulisut piffissani sulinngiffimmini tassaniissinnaassannginnersut sulisitsisup aalajangigassaraa.

Aalajangersakkamili pineqanngilaq illoqarfimmi nunaqarfimmiluunniit aalajangersimasumik suliffik, sulisoq inini sulisitsisup atugassiissutaani najugaqaraluarpalluunniit. Taassuma sumiiffik aalajangersimasumik suliffiusoq, isumannaallisaaneq inillu atugassiissutaasut pissutigalugit sulisunit, piffissani sulisut sulinngiffianni najorneqarsinnaangitsoq assiginngilaa, sulisummi piffissani sulinngiffimmini illoqarfimmi nunaqarfimmiluunniit najugaqarnissaat akornutissartaqanngilaq. Pisuni taakkunani aalajangiisuusut tassapput sumiiffimmi pissusiviusut, imaangitsoq sulisitsisup init il.il. atugassiissutigineqartut qanoq atorneqarnissaannik aalajangersaasimanera.

Sumiiffiit suliffiusut inoqarfinniittut taakkuluunniit qanittuiniittut pineqartillugit, akiliunneqarluni angalanerit akileraaruserneqartarnerat pillugu maleruagassat nalinginnaasut malinneqassapput, tassa sumiiffik suliffiugallartoq pineqanngippat.

Assersuut: Piiavik

Piiavik inoqarfimmit qaninnermit imaatigut ornissallugu 60 km-inik ungasitsigisumiippoq. Sulineq nikittaalluni sap.ak. pingasuni suleriarluni sap.ak. ataatsimi sulinngiffeqartarluni ingerlanneqarpoq. Sulisut piiaviup inoqarfiullu qanittumiittup akornanni angallanneqarnerat sulisitsisup umiatsiaanik pisarpoq. Taava ingerlaqqissagaanni tamanna pisortat timmisartoqarfiutaannit timmisartorluni pisarpoq.

A piiavimmi sulisuusoq qaartitsisarnermillu aqutsisuusoq inoqarfimmi qanittumiittumi najugaqarpoq. A sap.ak. pingasuni sulereeraangami inoqarfimmut angallammik siumut utimullu akiliunneqarluni angalasarpoq. A-p angalanera akiliunneqarluni angalanertut isigineqassanngilaq, angalanermi inoqarfimmut qaninnermut angalaneruvoq, aatsaallu tassanngaanniit angalanissamut pisortat periarfissiissutaat aqqutigineqarsinnaammata.

B qamutitik qillerutitik ingerlatsisutut atorfeqartoq Sisimiuni najugaqarpoq, taamaammallu allatuulli inoqarfimmut qaninnermut angallammik angallanneqartarluni, taassumalu saniatigut najukkaminut timmisartumik (siumut utimullu) angalasarpoq sulisitsisup akiligaanik. B-mut tassaapput akiliunneqarluni angalanerit § 19 b, imm. 4-mi pineqartut, taamaammallu akiliunneqarluni angalanerit, ukiumoortoq ataaseq kisiat pinnagu, siumut utimullu angalanerit ataatsimut 2.000 kr.-inik nalilittut akileraaruserneqassapput, sulisitsisup aningaasartuutaa appasinnerusimangippat.

Piiavik inoqarfiup qanitaaniittoq pillugu assersuummut nassuiaatit:

Piiavimmiit inoqarfimmut angalanerit timmisartumut qulimiguulimmut suluusalimmulluunniit ilaalluni pippat, tamanna angalanerit akileraaruserneqarnissaannut sunniuteqassanngilaq. Tamanna soorlu pisinnaavoq piiavik Nunami allanngutsaaliukkamiippat, sulisullu Nerlerit Inaannut timmisartuunneqartarpata. Sulisut Nerlerit Inaanni nalinginnaasumik najugallit angalanerit akileraaruserneqassanngilaq. Tamannattaq angalanerup inoqarfimmut qaninnermut angalaneruneranik, aatsaallu tassanngaanniit angalanissamut pisortat periarfissiissutaasa aqqutigineqarsinnaanerannik pissuteqarpoq.

Sulisulli Kalaallit Nunaanni avataaniluunniit nalinginnaasumik najukkaminut ingerlaqqinnerminni angalanerit sulisitsisumit akileraaruserneqartoq § 19 b, imm. 4 naapertorlugu akileraaruserneqartussaassaaq.

PIFFISSAQ AKILERAARUSIIFFISSAQ

Ukioq aningaasarsiorfiusoq 2022

Akiliunneqarluni angalanerup nalinga ukiumi aningaasarsiorfiusumi angalanerup pisiarinearfiani aningaasarsiat akileraaruteqaataasussat naatsorsorneranni ilanngunneqassaaq, angalanerup ukiumi aningaasarsiorfiusumi kingusinnerusumi pinissaa apequtaatinnagu.

Assersuut

Atorfilik martsimi 2023-mi akiliunneqarluni angalavoq. Angalaneq sulinngiffeqarluni angalaneruvoq. Angalanissaq sulisitsisumit decembarip 22-ane pisiarinearpoq. Akileraaruserneqarnera ukiumi 2022-mi pissaaq, angalanissaq ukioq taanna pisiarinearqarmat.

Ukioq aningaasarsiorfiusoq 2023 taassumalu kingorna

Akiliunneqarluni angalanerit ukioq aningaasarsiorfiusoq 2023 aallarnerfigalugu tassaalissapput aningaasarsiat A-t, tak. § 75, imm. 1, nr 4. Piffissaq akileraarfiusussaq tamatuma malitsigisaanik allanngortinneqanngilaq.

Sulisitsisup akiliunneqarluni angalanerit nalingisa akileraarutaat qaammammi, akileraarusiinissap atuutilerfiani unerartissavai (pisunik ilutigiissitsin

SULISITSISUP AKILIUNNEQARLUNI ANGALANERIT IL.IL. PILLUGIT PISUSSAAFFII

Akiliunneqarluni angalanermut § 19 b malillugu akileraaruteqaataasussamut aningaasartuutitik akiliisoqarpat, sulisitsisup:

- Ukiumi akiliunneqarluni angalanerit akileraarutitigut nalingat § 19 b malillugu naatsorsussavaa
- Ukiup aningaasarsiorfiusup naanerata kingorna ukiumi januaarip qaammataa naatinnagu ukiup siuliani akiliunneqarluni angalanerit paasissutissiissutigissavai, tak. akileraaruserinermik ingerlatsineq pillugu Inatsisartut inatsisaanni § 30.

Akeqanngitsumik ajunngitsorsianik nalunaarutiginninnginneq akiliitsinikkut pineqaatissiinermik malitseqarsinnaavoq.

Akiliunneqarluni angalanerit ukioq aningaasarsiorfiusoq 2023 aallarnerfigalugu tassaalissapput aningaasarsiat A-t, sulisitsisut akileraarutitik A-nik unerartitsinissamut aammalu sulisoqarnermut akitsuummik naatsorsuinissamut pisussaaffeqalerannik malitseqartumik. Takuuk matuma kinguliani takussutissiaq.

Ukioq aningaasarsiorfiusoq 2022

	Aningaasarsiat A-t	Ani-ngaa-sarsiat B-t	Akileraaruteqaataasusaanngitsaq	Sulisoqarnermut akitsuut	Nalunaarutiginnittusaaneq / immersugassaq
Akiliunneqarluni angalanerit		X		Naagga	Aap – ukiumoortumik A11
Sulinngiffimmi akiliunneqarluni angalanerit		X	Ukiumoortumik sulinngiffimmi akiliunneqarluni angalaneq ataaseq	Naagga	Aap – ukiumoortumik A11
Atorfinikkiartorluni atorfimmillu soraarnermi angalanerit			Aap	Naagga	Naagga
Qanigisap perululluni napparsimanerani toquneraniluunniit angalaneq			Aap	Naagga	Naagga

Ukioq aningaasarsiorfiusoq 2023 taassumalu kingorna

	Aningaasarsiat A-t	Ani-ngaa-sarsiat B-t	Akileraaruteqaataasusaanngitsaq	Sulisoqarnermut akitsuut	Nalunaarutiginnittusaaneq / immersugassaq
Akiliunneqarluni angalanerit	X			Aap	Qaammatikkaartumik – A1 Ukiumoortumik – A11
Sulinngiffimmi akiliunneqarluni angalanerit	X		Ukiumoortumik sulinngiffimmi akiliunneqarluni angalaneq ataaseq	Aap	Qaammatikkaartumik – A1 Ukiumoortumik – A11
Atorfinikkiartorluni atorfimmillu soraarnermi angalanerit			Aap	Naagga	Naagga
Qanigisap perululluni napparsimanerani toquneraniluunniit angalaneq			Aap	Naagga	Naagga

INNERSUUSSINERT

Aningaasarsianit akileraarutit pillugit Inatsisartut inatsisaanni § 13, § 19 b, § 19 c, § 34, imm. 1, nr. 15 aamma § 75.

Akileraaruserinermik ingerlatsineq pillugu Inatsisartut inatsisaanni § 30.

Akileraartarnermut Aqutsisoqarfiup akiliunneqarluni sulinngiffimmi angalasarnerit akileraarusersorneqartarnerinut ilitsersuutaa 25. april 2008-meersoq.



WWW.AKA.GL

Akileraartarnermut Aqutsisoqarfik
Intaleeqqap Aqqutaa nr. 1
Postboks 1605
3900 Nuuk